

BARAZA LA WAWAKILISHI ZANZIBAR

Simu Nam. + 255 24 2230602/1

Fax Nam. + 255 24 2230215

Tovuti: www.zanzibarassembly.go.tz



SANDUKU LA BARUA 902,
ZANZIBAR

Barua Pepe: zahore@zanlink.com

HOTUBA YA MUHTASARI WA RIPOTI YA KAMATI YA KUSIMAMIA OFISI ZA VIONGOZI WAKUU WA KITAIFA KWA MWAKA WA FEDHA 2017/2018

Mheshimiwa Spika,

Awali ya yote sina budi kumshukuru Mwenyezi Mungu Mtukufu Allah (S.W) mwingi wa rehma na mwenye kurehemu, pamoja na kumtakia rehma Mtume wake, Muhammad (S.A.W) kwa kutujaalia, uhai na afya njema na kutuwezesha kukutana tena katika Mkutano huu wa tisa wa Baraza la Tisa na kuniwezesha mimi kusimama mbele ya Baraza lako kuwasilisha Ripoti hii ya Kamati. Hapana shaka yoyote kuwa huu si uwezo wetu bali ni wake yeye *Allah Subhanahu Wataala*, hivyo hatuna budi kusema “Alhamdulillah”, na pia kuwaombea wale walio wagonjwa kupata nafuu, pia nachukua fursa hii kutoa shukrani za kipekee kwa Mheshimiwa Rais wa Zanzibar na Mwenyekiti wa Baraza la Mapinduzi, Dkt Ali Mohamed Shein na Mheshimiwa Makamu wa Pili wa Rais wa Zanzibar, Balози Seif Ali Iddi, kwa kazi kubwa sana wanayoifanya ya kuiongoza nchi yetu tunamuomba *Allah- Sub-Hana-Wataala* awape nguvu, hekima na busara kwa kushirikiana na Mawaziri wote na Serikali hii ili waweze kutekeleza majukumu yao ipasavyo ya kuiongoza nchi yetu.

Mheshimiwa Spika,

Napenda pia kuchukua nafasi hii kukushukuru wewe, kwa kuniruhusu kusimama mbele ya Baraza lako Tukufu, kuwasilisha Ripoti ya Kamati hii ya kusimamia Ofisi za Viongozi Wakuu wa kitaifa ya mwaka wa fedha 2017/2018, kwa niaba ya Kamati yetu ambayo mimi ndio mwenyekiti.

Mheshimiwa Spika,

Baada ya maneno hayo machache ya utangulizi, sasa naomba nijielekeze katika lengo la kuwepo kwangu hapa. Lakini kabla ya kuendelea na chochote, napenda kutamka kwamba, huu ninaouwasilisha ni muhtasari wa Ripoti ya Kamati. Hivyo, Ripoti yote kwa ujumla wake, tayari imeshasambazwa kwa wajumbe, sambamba na muhtasari huu naomba uingie katika *“hansard”* za Baraza.

MAJUKUMU YA KAMATI

Katika kutekeleza majukumu ya msingi kwa mujibu wa kanuni za Baraza la Wawakilishi kifungu nambari 108(14) ambayo yanasimamiwa na Kamati ya Kusimamia Ofisi za Viongozi Wakuu wa Kitaifa kwa mujibu wa kifungu hicho kamati inatekeleza majukumu ya kazi kama ifuatavyo:

- i. Kufuatilia utekelezaji wa maagizo ya Kamati yaliyotolewa katika Ripoti ya Kamati ya mwaka uliotangulia;
- ii. Kufuatilia utekelezaji wa Sera na Mipango ya Wizara husika kwa kadri Spika atakavyoelekeza kwa mujibu wa malengo yaliyowasilishwa Barazani wakati wa usomaji Bajeti na Hotuba nyengine za Waziri alizotoa katika Baraza;
- iii. Kufuatilia utekelezaji wa Miradi ya Maendeleo ya Kitaifa na Miradi ya Wananchi ya Wizara husika;
- iv. Kuchunguza na kufuatilia mapato na matumizi ya kila mwaka ya Serikali na kama matumizi yaliyofanywa yalizingatia thamani halisi ya fedha na kufikia lengo;
- v. Kuchambua mapendekezo ya Serikali kuhusu makadirio ya Wizara husika ya mapato na matumizi ya kila mwaka;
- vi. Kushughulikia Miswada ya Sheria itakayokabidhiwa kwake na Spika;
- vii. Kuchambua ahadi zote za Wizara zilizo chini ya Kamati kama zitakavyokuwa zikitolewa katika Baraza na kufuatilia utekelezaji wa ahadi hizo; au
- viii. Kufikiria jambo jengine lolote litakalopelekwa.

OFISI ZINAZOSIMAMIWA NA KAMATI

Kamati ya Kusimamia Ofisi za Viongozi Wakuu wa Kitaifa katika utekelezaji wa kazi zake imekuwa ikizisimamia wizara mbili zifuatazo:

- i. Ofisi ya Rais, na Mwenyekiti wa Baraza la Mapinduzi, na
- ii. Ofisi ya Makamu wa Pili wa Rais.

Kamati ya Kusimamia Ofisi za Viogozo Wakuu wa Kitaifa kwa mwaka wa fedha 2017/2018, ilifanya kazi zake katika mizunguko mitatu, ikiwa ni jumla ya wiki sita, ambazo zilifanyiwa kazi kama ifuatavyo:

- a) Kamati ilifanya kazi zake Unguja kuanzia tarehe 14/08/2017 hadi tarehe 25/08/2017 kwa mzunguko wa kwanza.
- b) Kuanzia tarehe, 13/11/2017 hadi tarehe 17/11/2017, Kamati ilifanya kazi zake Unguja na tarehe 20/11/2017 hadi 24/11/2017, Kamati ilimalizia kazi zake kwa Upande wa Pemba kwa mzunguko wa pili.
- c) Aidha Kamati ilifanya kazi zake Unguja kuanzia tarehe 15/01/2017 hadi 26/01/2017 kwa mzunguko wa tatu.

OFISI YA MAKAMU WA PILI WA RAIS

OFISI YA MAKAMU WA PILI WA RAIS IMEUNDWA NA IDARA NA TAASISI ZIFUATAZO:

- i. Idara ya Huduma za Makamu wa Pili wa Rais
- ii. Idara ya Mipango Sera na Utafiti
- iii. Baraza la Wawakilishi
- iv. Idara ya Uendeshaji na Utumishi
- v. Tume ya Kitaifa ya Kuratibu na Kudhibiti Madawa ya Kulevya
- vi. Tume ya Uchaguzi Zanzibar
- vii. Wakala wa Serikali wa Uchapaji Zanzibar
- viii. Kamisheni ya Kukabiliana na Maafa
- ix. Tume ya Ukimwi
- x. Idara ya Watu wenye Ulemavu
- xi. Idara ya Sherehe na Maadhimisho ya Kitaifa
- xii. Ofisi kuu Pemba

Mheshimiwa Spika,

Kamati yeu kwa ujumla iliweza kufanya kazi zake vizuri kwa Ofisi ya Makamu wa Pili wa Rais, hata hivyo kutokana na ukubwa wa ofisi hii Kamati haikuweza kuzifikia baadhi ya Idara. hata hivyopamoja na kwamba Kamati haikuweza kufikia baadhi ya Idara lakini Kamati ilipokea taarifa ya ujumla ya Wizara juu ya Mpango wa Mapato na Matumizi wa taasisi hizo wajumbe wa kamati walipata fursa ya kuhoji mambo mbali mbali na hatimae kujiridhisha kutokana na majibu ya jumla ya wizara na kamati ilizishauri Idara hizo

kuendelea kufanya kazi vizuri na kwa bidii ili kufikia malengo yaliokusudiwa na kuweka taswira nzuri katika Ofisi ya Makamu wa Pili wa Rais.

BARAZA LA WAWAKILISHI

Mheshimiwa Spika,

Kwa upande wa Baraza la Wawakilishi limeweza kufanya kazi za kawaida kama ilivyoeleza katika Katiba ya Zanzibar kifungu cha 88(b)(c) na (d) ambapo shughuli hizo zote kwa mujibu wa maelekezo ya Katiba yetu Baraza lako limekuwa linayatekeleza, lakini pamoja na ufanisi huo Baraza lako tukufu limekuwa likikabiliwa na changamoto ambazo Kamati inaomba kupatiwa ufumbuzi, kama vile kuwepo kwa tatizo la mrejeo wa sauti (Eco) katika ukumbi wa mikutano jambo ambalo halipendezi, na hupelekea baadhi ya wakati wajumbe na wasikilizaji vikao kushindwa kusikia vizuri mijadala ya vikao hivyo tatizo ambalo ni la muda mrefu. Kamati imeagiza kufanyiwe matengenezo hasa katika Ukumbi mkubwa ili kuondoa tatizo hilo.

IDARA YA URATIBU WA SHUGHULI ZA SMZ, SMT NA MUUNGANO

Mheshimiwa Spika,

Kamati ilipata fursa ya kupokea taarifa ya utekelezaji wa majukumu ya Idara ya uratibu. Kwa ujumla Kamati imeridhishwa na utekelezaji wa kazi za Idara hii pamoja na mambo mengine iliweza kufanya ziara kuangalia maendeleo na changamoto ya miradi ya **TASAF III**, Unguja, Pemba pamoja na kupata kwenda kujifunza kwa wenzetu wa Tanzania Bara na kujionea wenyewe jinsi gani wananchi walivyoupokea kwa vitendo mpango wa kujiwekea akiba katika vikundi ambapo kamati yetu ilielezwa namna ambavyo wananchi hao wanavyofaidika kupitia mpango huo.

Kamati imefarajika sana kuona namna Serikali zetu kupitia mfuko wa maendeleo wa jamii (**TASAF**) inavyowasaidia wananchi katika nyanja tofauti za huduma za jamii kama vile maji, elimu, afya, mazingira na masuala mengineyo, ambapo pia Kamati ilipata nafasi ya kutembelea miradi hiyo na kuona maendeleo na changangomoto wanazokabiliana nazo wananchi na jinsi gani Serikali inavyojitahidi kuzitafutia suluhisho la kuzitatua changamoto hizo.

Mheshimiwa Spika,

Kwa ujumla Idara inafanya vizuri katika kuhakikisha majukumu yake yanatekelezwa ipasavyo. Hata hivyo Kamati kutokana na kuwepo kwa baadhi ya changamoto inashauri kuzingatiwa kwa baadhi ya mambo kama ifuatavyo:

Mheshimiwa Spika,

Kamati inaihimiza Serikali kuhakikisha kuwa inatoa mchango wake kwa Mradi wa TASAF kwa wakati kwani kutofanya hivyo kutapelekea kutokamilika kwa wakati Miradi iliyokusudiwa kwa walengwa.

Kamati inaiagiza Wizara kuzihimiza sekta husika juu ya umuhimu wa usimamiaji madhubuti na uendelezaji na kuitunza miradi iliyokamilika ili iweze kunufaisha jamii yote iliyozungukwa na miradi hiyo kwa ujumla.

Aidha, Kamati imeishauri Idara ya uratibu wakati wa kuibuliwa Miradi ya ujenzi wa skuli, ni vyema zaidi kuzingatiwa ujenzi wa skuli za ghorofa ili kwenda sambamba na uhaba wa ardhi iliyopo sambamba na kukidhi haja ya mahitaji ya madarasa kwa skuli hizo.

Kamati pia imeshauri Waratibu na Wakurugenzi wa miradi ya TASAF kuhakikisha kuwa wanasimamia upatikanaji wa taarifa za ukaguzi wa miradi husika ya TASAF ili kupatikana kwa ripoti ambayo itawezesha kuelewa mafanikio na changamoto za miradi.

OFISI YA URATIBU WA SHUGHULI ZA SMZ- DAR ES SALAAM

Mheshimiwa Spika,

Mingoni mwa majukumu yake ya msingi ya ofisi hii kuratibu shughuli za SMZ kwa upande wa Tanzania Bara pamoja na kukuza na kuimarisha ushirikiano kati ya taasisi/Wizara za SMZ na zile za Muungano, kukuza na kuimarisha mashirikiano baina ya washirika wa maendeleo, na taasisi za kibalozzi, ofisi hii imekuwa ikifanya kazi zake vizuri na Kamati ilifurahishwa na utendaji kazi wa jumla na inashauri ifuatavyo ili Ofisi hii iweze kutekeleza majukumu yake kwa ufanisi zaidi.

Kamati inashauri licha ya kufanyika kwa ukarabati katika baadhi ya sehemu ya jengo la ofisi lakini ukarabati zaidi unahitajika kama kuendelea kupiga rangi kwa baadhi ya maeneo ya jengo ili liweze kuleta haiba na taswira nzuri ya Serikali ya Mapinduzi ya Zanzibar ambapo ofisi hii ndio pekee inayotumiwa na Serikali yetu kule Dar es Salam.

Pia, Kamati inaihimiza Serikali kusimamia na kutekeleza mpango wake wa kuwa na jengo bora na la kisasa litakalotumika kwa ajili ya shughuli za Idara ya Uratibu za SMZ na taasisi nyengine ambazo zinafanya kazi kwenye jengo hilo.

Kamati inaishauri Ofisi ya Uratibu wa Shughuli za SMZ iliyopo Dar es Salaam kutafuta utaratibu zaidi wa kuweza kuitangaza Ofisi hiyo kupitia maadhimisho ya sherehe za Mapinduzi ya Zanzibar ya kila mwaka ili taasisi mbali mbali za Serikali ya SMT, SMZ, Balozi na taasisi za watu binafsi ziweze kuitumia ofisi hiyo na kurahisisha shughuli za ushirikiano kati ya taasisi hizo na Serikali.

Aidha, Kamati yangu, inaishauri Ofisi ya Makamu wa Pili wa Rais, kufuatilia suala la upatikanaji wa mgao wa tozo la ukusanyaji wa malipo ya minara ya kimataifa ya kuongozea meli la zaidi ya shilingi bilioni 1 ili Serikali iweze kupata mapato yake.

Ofisi ya Uratibu ya SMZ iliyopo Dar-es-Salaam imetekeleza wajibu wake wa kuratibu ufuatiliaji wa suala hilo lakini bado suala hilo halijapatiwa ufumbuzi kati ya taasisi zinazohusika za Serikali zetu mbili za SMZ na SMT. Kwani ni kipindi cha miaka miwili sasa upande wa Serikali ya Zanzibar imekuwa ikidai deni hilo la asilimia 41 za mgao wote ambapo Tanzania Bara inapata asilimia 59 kutokana na mgawanyo huo.

Mheshimiwa Spika,

Kamati imeishauri Wizara husika kutoa muongozo maalum kwa Wizara na taasisi zote za Serikali ya Mapinduzi ya Zanzibar juu ya umuhimu wa kuitumia ofisi ya uratibu wa shughuli za SMZ iliyopo Dar es Salaam. Kabla ya maafisa na watendaji wao kuaanza kazi zao za kiserikali wanapokuwa huko.

TUME YA KITAIFA YA URATIBU NA UDHIBITI DAWA ZA KULEVYA

Mheshimiwa Spika,

Tume ya Kitaifa ya Uratibu na Udhhibiti wa dawa za kulevya ina jukumu kuu la kuratibu mapambano dhidi ya uangamizaji, usafirishaji na matumizi ya dawa za kulevya ambazo ni changamoto kubwa kwa jamii yetu na zinaendelea kuathiri vijana wengi ambao ndio nguvu kazi ya Taifa. Pia ina jukumu la kutoa taaluma kwa jamii juu ya athari za dawa za kulevya, tiba pamoja na ushauri nasaha kwa waathirika wa janga hilo.

Mheshimiwa Spika,

Tume inaendelea kutekeleza majukumu yake kwa ufanisi mkubwa licha ya kukabiliwa na changamoto kadhaa ambazo kwa kiasi kikubwa zimekuwa zikirejesha nyuma mapambano dhidi ya mtandao huo wa biashara haramu ya dawa za kulevya.

Mheshimiwa Spika,

Miongoni mwa changamoto zinazoikabili Tume hii ni kama vile upotevu wa vielelezo vya kesi na kukosekana kwa takwimu halisi juu ya idadi ya vijana walioingia na kutoka katika Kituo cha Tiba na Marekebicho ya Tabia (*Sober Houses*) ambapo kamati imebaini kwamba vijana wengi wanaokuwepo kwenye nyumba hizo huwa wanajirejea rejea au huwa wanabadilisha nyumba hizo ambapo hukaa nyumba moja na baadae kuhamia katika (*Sober Houses*)

Mheshimiwa Spika,

Ili Kusaidia kukabiliana na changamoto hizo Kamati yangu inatoa ushauri na maelekezo yafuatayo:

Kamati inaishauri Tume ya Uratibu na Udhubiti wa dawa za kulevya kuwa karibu na taasisi zote ambazo zinahusika na kesi za madawa ya kulevya ili kuhakikisha kwamba wale wote wanaojishughulisha na biashara hii haramu ya dawa za kulevya wanachukuliwa hatua zinazostahiki za kisheria na kwamba tatizo la upotevu wa vielelezo vya kesi za madawa ya kulevya halitokei tena kama hapo awali.

Mheshimiwa Spika,

Aidha, Kamati imeishauri Tume kuwashirikisha kikamilifu Wakuu wa Mikoa, Wilaya, masheha na hata mabalozi wa nyumba kumi katika kupata taarifa za watu wanaojihusisha na biashara za madawa ya kulevya nchini.

Pia, kushirikiana na Taasisi husika kuhakikisha mazingira bora ya ulinzi Bandarini yanaimarishwa ikiwa ni pamoja na kuweka wataalamu na vifaa vya kutosha ili kudhibiti uingizaji na usambazaji wa dawa za kulevya kupitia Bandari rasmi na kwa upande wa bandari zisizorasmi kamati inashauri kuwatumia balozi wa nyumba kumi ambao ni rahisi Tume kuwafikia kupitia kwa masheha wao, kufanya hivyo kutasaidia kupata taarifa na ndipo itakuwa rahisi kujua namna bora ya kuendeleza vita dhidi ya wahalifu hao.

Mheshimiwa Spika,

Kamati imesisitiza Kituo cha Tiba na Marekebisho ya Tabia kwa vijana walioacha utumiaji wa dawa za kulevya kilioopo Kidimini kinamalizwa haraka ili kiweze kutumika kwa lengo lililokusudiwa.

TUME YA UCHAGUZI ZANZIBAR

Mheshimiwa Spika,

Tume ya Uchaguzi ya Zanzibar ni Taasisi iliyoungwa kwa mujibu wa Katiba ya Zanzibar kifungu 119(1). Majukumu ya Tume hiyo pia yameelezwa katika Katiba hiyo ya mwaka 1984.

Mheshimiwa Spika,

Kamati yangu imeridhishwa sana na utendaji wa Tume ya Uchaguzi. Hata hivyo, Kamati yangu imebaini baadhi ya mapungufu au changamoto ambazo zinaikabili Tume hiyo na zinahitaji kufanyiwa kazi. Miongoni mwa changamoto hizo ni: uhaba wa vyombo vya usafiri hasa magari, ukosefu wa majengo ya Ofisi za kudumu za wilaya na ukosefu wa ghala la kuhifadhia vifaa, pamoja na kwamba Serikali imeshawapatia nyumba ambayo ilikuwa ikimilikiwa na Shirika la Bandari.

Mheshimiwa Spika,

Kamati imeshauri kufanyiwa haraka mchakato wa ununuzi wa magari mawili ya Tume ambayo yanashughulikiwa na Wizara ya Fedha na Mipango. Aidha, Kamati imeagiza kukamilishwa kwa ukarabati wa nyumba iliyokabidhiwa Tume na Serikali ili Tume iweze kulitumia jengo hilo na kuhifadhia vifaa ambavyo Tume ya Uchaguzi imevihifadhi kwenye ghala ambalo si lake liliopo Kikwajuni.

WAKALA WA SERIKALI WA UCHAPAJI ZANZIBAR

Mheshimiwa Spika,

Kamati ya kusimamia Ofisi za Viongozi imeridhishwa sana na utendaji wa Wakala wa Serikali wa Uchapaji. Kimsingi, Wakala inaonekana kupiga hatua katika ushindani wa Biashara ya uchapaji kwa kuimarisha huduma zake ambazo kwa sasa zimekuwa zikivutia wateja wengi. Wakala imeweza kununua mitambo ya kisasa ya uchapaji pamoja na

kuimarisha huduma ikiwa ni pamoja na kuanzisha bohari yake ambayo inatarajiwa kutoa huduma kama duka la vifaa vya kuandikia kwa taasisi za Serikali na watu binafsi. Mbali na jitihada zinazochukuliwa na Wakala bado Kamati imebaini changamoto kadhaa inazoikabili Taasisi hiyo kama ifuatavyo: Upokeaji wa kazi za machapisho ni mdogo hususan katika taasisi za Serikali, Ukosefu wa jengo la kudumu la Wakala Pemba.

Mheshimiwa Spika,

Katika kukabiliana na changamoto hizo, Kamati inaishauri Wakala kuendelea kutafuta soko la nje ili kuongeza mapato ya Serikali. Kamati pia imeagiza kuharakishwa ujenzi wa Bohari ya Wakala ili kuweza kutoa huduma za uuzaji wa vifaa vyao (stationaries) kwa taasisi za Serikali na binafsi.

Kamati imeishauri Serikali kuweka msisitizo zaidi kwa wizara na taasisi zake zote sambamba na kuzishajihisha sekta binafsi kumtumia Wakala huyo ili kuweza kusaidia katika kuongeza mapato ya Serikali.

KAMISHENI YA KUKABILIANA NA MAAFA

Mheshimiwa Spika,

Kamati yetu ilitembelea Kamisheni ya kukabiliana na maafa na kujionea jinsi kamisheni ilivyojipangia mpango endelevu wa kujenga uwezo kwa jamii katika kukabiliana na maafa jambo ambalo limepelekea kutekeleza majukumu yake kwa ufanisi wa hali ya juu. Licha ya kuwa Kamisheni inatekeleza majukumu yake kwa ubora wa hali ya juu, Kamati imebaini changamoto mbali mbali zinazoikabili Kamisheni hiyo ambazo zinahitaji kupatiwa ufumbuzi. Miongoni mwa changamoto hizo ni uhaba wa Bajeti kunakopelekea kuacha kutekeleza baadhi ya shughuli nyengine muhimu, Ukosefu wa jengo la ofisi ambapo kwa sasa Kamisheni inatumia jengo la Kituo cha huduma za dharura

Mheshimiwa Spika,

Kamati inapongeza Ofisi ya Makamu wa Pili wa Rais kwa kuweza kuanzisha Akauti Maalum kwa ajili ya kupokea michango ya kukabiliana na maafa yanapotokea. Aidha, Kamati inaishauri Ofisi kuwa kuna umuhimu wa kuwa na maghala maalumu ya kuhifadhia vifaa vya maafa ili viweze kuhifadhika vizuri na kutumika wakati wa maafa.

Mheshiwa Spika,

Vile vile, Kamati imeiagiza Kamisheni kuharakisha kuandaa muundo pamoja na *Kanuni ya Sheria Nam. 1/ 2015* ya Kupunguza na Kukabiliana na Maafa. Ili Taasisi hiyo iweze kufanyia kazi kwa ufanisi. Kamati imeiagiza Kamisheni kufanya uchunguzi wa kupitia Sheria inayotoa vibali vya uvuvi ili kuweza kukabiliana na maafa yanayoweza kutokea kutokana na matumizi ya uvuvi wa gesi.

TUME YA UKIMWI ZANZIBAR

Mheshimiwa Spika,

Kamati ya Kusimamia Ofisi ya Viongozi Wakuu wa Kitaifa katika mizunguko yake ilipata kuifikia Tume ya UKIMWI na kupata maoni ya watendaji ambapo pamoja na mambo mengine Kamati ilielezwa mambo mbali mbali ya kimaendeleo na changamoto ambazo Tume imekuwa ikikabiliana nazo.

Katika utekelezaji wa majukumu yake Tume ya UKIMWI inakabiliwa na changamoto ya uhaba wa watoa huduma za afya na wafanyakazi, uchache wa vifaa tiba na vifaa vya uchunguzi katika utoaji wa huduma za afya ya uzazi hasa katika utoaji wa huduma za saratani ya kizazi na kasi ndogo ya mabadiliko ya tabia katika jamii.

Mheshimiwa Spika,

Kufuatia changamoto hizo, Kamati imeishauri Ofisi ya Makamu wa Pili wa Rais kutokana na uzito wa usimamiaji wa suala la UKIMWI ni vyema Ofisi kuipatia kasma yake ya kibajeti Tume hii ili iweze kutekeleza majukumu yake ipasavyo.

Kamati imeishauri Tume kuendelea kusimamia uzingatiaji wa masuala ya UKIMWI katika sekta za Serikali na zile za binafsi kama sheria na miongozo ya nchi ikiwemo Sera, Mkakati na Sheria ya VVU na Ukimwi na miongozo inayohusiana na Usalama na Afya sehemu za kazi inavyoelekeza. Aidha, Kamati imeiagiza Tume kuhakikisha kuwa inaimarisha jitihada za ufuatiliaji wa taarifa za maambukizi ya UKIMWI katika ngazi za chini ili kuweza kupatikana taarifa sahihi zisizogongana na maeneo mengine ya ufuatiliaji.

Mheshimiwa Spika,

Kamati pia, inaishauri Tume iendelee kuihamasisha jamii kufanya uchunguzi wa saratani ya kizazi mara kwa mara hasa kwa watu wanaoishi na VVU ambao wamo katika hatari ya kupata saratani hiyo. Pamoja na kuhamasisha mabadiliko ya tabia katika jamii ili kuweza kujikinga na maambukizo ya Ukimwi.

IDARA YA WATU WENYE ULEMAVU

Mheshiwa Spika,

Kwa kweli Idara hii imekuwa ikifanya shughuli zake vizuri na inastahili pongezi katika kuhakikisha haki na fursa sawa kwa Watu wenye Ulemavu zinapatikana.

Mheshimiwa Spika,

Pamoja na utekelezaji wake mzuri ambao umeonesha mabadiliko makubwa na kutoa matumaini kwa watu wenye ulemavu lakini Idara hii kama taasisi nyengine haikukosa kuwa na changamoto kutokana na kuwa inaendeleza kusimamia shughuli zake za siku hadi siku ambapo baada ya Kamati yetu kutembelea na kukutana na watendaji, Kamati ilibaini kwamba zipo changamoto ambazo ni vyema na busara kuzitafutia njia ya kuzitatua. Changamoto hizo ni kama Uhaba wa bajeti ambao ni kikwazo katika utekelezaji wa kazi zake ili kufikia lengo kama walivyojipangia, Kuwepo kwa uhaba wa vyombo vya usafiri, ukizingatia kwamba shughuli za idara hii zinahitaji ufuatiliaji wa mara kwa mara, kama vile kufuatilia kesi katika mahakama mbali mbali, lakini pia kuwafuatilia waathirika mbali mbali wanaofanyiwa vitendo vya udhalilishaji. Changamoto nyengine ni kesi za udhalilishaji zinazogusa watu wenye ulemavu kukosa kufika katika ngazi za kisheria za maamuzi na utoaji haki kutokana na kuwepo kwa nguvu ndogo za watendaji wanaofuatilia kesi hizo na kukosekana kwa Mkalimani wa lugha za alama.

Mheshimiwa Spika,

Kufuatia kuwepo kwa changamoto hizo, Kamati imeishauri Wizara kutoa kipaumbele maalumu katika Bajeti ya Serikali kwa ajili ya ajira kwa watu wenye ulemavu.

Aidha Kamati imeishauri Wizara kuona umuhimu wa kuliwekea Baraza la Taifa la Watu wenye Ulemavu Kasma yake badala ya Baraza hilo kuendelea kutegemea Bajeti ya Idara

ambayo bado haijitoshelezi pamoja na kuwawazesha wanasheria wanaosimamia kesi wa idara hii ili kuzisimamia vyema kesi za udhalilishaji hasa kwa watu wenye ulemavu.

Mheshimiwa Spika,

Kamati imeona kuna umuhimu pia wa Idara kushirikiana na Wizara ya Elimu na Mafunzo ya Amali kufanya utafiti kuelewa takwimu za idadi ya Walimu wenye taaluma za watu wenye mahitaji maalum ili waweze kusaidia kuwaendeleza kielimu watu wenye mahitaji maalum.

IDARA YA SHEREHE NA MAADHIMISHO YA KITAIFA

Mheshimiwa Spika,

Idara hii imeendelea kutekeleza kazi zake kwa ufanisi na kwa namna ya pekee, Kamati inatoa pongezi kwa Mheshimiwa Balozi Seif Ali Iddi ambaye ndie Mwenyekiti wa Kamati ya Kitaifa ya Sherehe kwa kufanikisha maadhimisho ya kutimiza miaka 54 ya Sherehe za Mapinduzi kwa mwaka 2018 kwa mafanikio makubwa.

Mheshimiwa Spika,

Licha ya ufanisi ilioupata Idara hii inakabiliwa na changamoto kama vile uhaba na uchakavu wa vifaa; yakiwemo mashamiana yanayotumika katika sherehe za kitaifa. Hivyo, Kamati inaishauri Serikali kutafuta namna ya kupata fedha kwa ajili ya kununua vifaa vipya na vya kisasa ambavyo vitatumika katika shughuli na Sherehe mbali mbali za kitaifa.

OFISI YA MAKAMU WA PILI WA RAIS – PEMBA

Mheshimiwa Spika,

Kwa upande wa ofisi hii kwa Pemba, ofisi inafanya kazi vizuri na kuisimamia ipasavyo utekelezaji wa bajeti kwa taasisi zote kwa upande wa Pemba. Kamati ilifika na kujionea utekelezaji wa miradi mbali mbali ya maendeleo iliyo chini ya TASAF, kuanza matayarisho ya awali kwa ajili ya ujenzi wa nyumba ya Mheshimiwa Makamu wa Pili wa Rais na mambo mengine.

Kwa upande wa changamoto kamati imebaini changamoto kuu katika Ofisi ya Makamu wa Pili wa Rais – Pemba ni kukosekana kwa nyumba sahihi ya kudumu kwa ajili ya kufikia Mheshimiwa Makamu wa Pili wa Rais anapofanya ziara zake kisiwani Pemba

kama nilivyokwishaelezea pamoja na changamoto kuwepo kwa ufinyu wa nafasi za kufanyia kazi kwa wafanyakazi wa OMPR Pemba.

Mheshimiwa Spika,

Kamati imehimiza OMPR kuharakisha kufuatilia na kukamilika kwa taratibu za kuanza kwa ujenzi wa nyumba ya makaazi ya Mheshimiwa Makamu wa Pili wa Rais iliyopo Pagali, Wilaya ya Chake Chake ili ujenzi huo uweze kufanyika kwa wakati na kumuwezesha kiongozi huyo kuwa na sehemu maalum ya kupumzikia akiwa kisiwani Pemba. Vilevile, Kamati imeishauri OMPR kuzingatia ushauri wa Ofisi ya Makamu wa Pili Pemba wa kujenga jengo la ziada ambalo litakidhi mahitaji ya Ofisi hiyo.

HALI YA KIFEDHA YA JUMLA KWA (OMPR) KATIKA KIPINDI CHA JULAI-DISEMBA, 2017/2018

Mheshimiwa Spika,

Katika kipindi cha Julai-Disemba, 2017, Ofisi ya Makamu wa Pili wa Rais pamoja na taasisi zake imeweza kuingiziwa jumla ya shilingi **15,434,739,762** ambazo ni sawa na asilimia **99** kati ya shilingi **15,577,894,526** ilizopanga kutumia kwa kazi za kawaida na mshahara.

Aidha, Ofisi imeweza kuingiziwa jumla ya shilingi **2,730,186,626** sawa na asilimia **45** kati ya shilingi **6,099,929,378** kwa kazi za maendeleo.

Kuhusu ukusanyaji wa Mapato Ofisi ya Makamu kupitia Idara ya Sherehe na Maadhimisho ya Kitaifa kwa kipindi cha Julai-Disemba, 2017, imefanikiwa kukusanya shilingi **7,485,000** sawa na asilimia **47**.

Mheshimiwa Spika,

Kamati yangu inapongeza Serikali kwa kuhakikisha inaipatia ofisi hii asilimia **99** ya bajeti Katika kipindi cha Julai-Disemba, 2017. Juhudi zaidi zinahitajika katika kukamisha fedha kwa ajili ya kuweza kutekeleza vyema kazi za miradi ya maendeleo.

OFISI YA RAIS NA MWENYEKITI WA BARAZA LA MAPINDUZI

Mheshimiwa Spika,

Ofisi ya Rais na Mwenyekiti wa Baraza la Mapinduzi inaundwa na Idara na Taasisi zifuatazo:

- i. Ofisi ya Faragha ya Rais;
- ii. Idara ya Huduma za Rais;
- iii. Idara ya Mawasiliano na Habari Ikulu;
- iv. Ofisi ya Baraza la Mapinduzi;
- v. Kitengo cha Sera, Ufuatiliaji na Tathmini;
- vi. Idara ya Ushirikiano wa Kimataifa na Uratibu wa Wazanzibari Wanaoishi Nje ya Nchi;
- vii. Idara ya Uendeshaji na Utumishi;
- viii. Idara ya Mipango Sera na Utafiti;
- ix. Ofisi ya Usalama wa Serikali; na
- x. Ofisi ya Rais na Mwenyekiti wa Baraza la Mapinduzi Pemba.

OFISI YA FARAGHA YA RAIS

Mheshimiwa Spika,

Ofisi ya faragha ina majukumu ya kuratibu na kusimamia shughuli za Mheshimiwa Rais pamoja na kufuatilia utekelezaji wa ahadi zake kwa lengo la kuhakikisha kuwa wananchi wanapata huduma zilizo bora na kuweka ukaribu baina ya wananchi na Serikali yao hasa na kiongozi wetu mkuu ambaye ni Mheshimiwa Rais.

Mheshimiwa Spika,

Kwa wakati wote Ofisi imeendelea kutelekeza majukumu yake kama ilivyojipangia. Kimsingi, Kamati imeridhishwa sana na utendaji wa ofisi ya faragha kwa kufuatilia na kusimamia utekelezaji wa ahadi za Mheshimiwa Rais pamoja na kuhakikisha shughuli zote za Ofisi hiyo zinatekelezwa na kukamilika kama zilivyopangwa licha ya kuwepo kwa changamoto wanazokabiliana nazo.

Mheshimiwa Spika,

Miongoni mwa changamoto inayoikabili Ofisi hii ni pamoja na kuwepo kwa athari kubwa za mmong'onyoko wa ardhi karibu katika nyumba zote za Ikulu. Kwa mfano: nyumba ya Ikulu Migombani, Kibweni, Bwefum na Mkokotoni kwa Unguja na Mkoani-Pemba. Kamati imeona suala hili linahitaji hatua za dharura na haraka ili kulipatia ufumbuzi.

IDARA YA MAWASILIANO IKULU

Mheshimiwa Spika,

Idara ya Mawasiliano Ikulu ni idara muhimu ambayo miongoni mwa majukumu ni kumuunganisha Mheshimiwa Rais wa Zanzibar na Mwenyekiti wa Baraza la Mapinduzi na wananchi wake anaowatumikia kwa kuweka bayana shughuli mbali mbali anazozitekeleza Mheshimiwa Rais kwa lengo la kuwafikishia Maendeleo wananchi wote.

Mheshimiwa Spika,

Ofisi hii, mbali ya utekelezaji mzuri wa majukumu yake lakini inakabiliwa na changamoto ya muda wa utoaji na urushaji wa habari katika vipindi vya redio na televisheni vya hotuba za Mheshimiwa Rais kuwa sio rafiki kwa wananchi wengi kuweza kupata taarifa zinazorushwa katika vipindi hivyo.

Mheshimiwa Spika,

Kamati imeshauri Idara kuandaa utaratibu na kupanga muda muafaka wa kurusha vipindi vya redio na televisheni vya hotuba ya Mheshimiwa Rais ambapo Kamati imependekeza kukaa na kuwataka ZBC Redio na Televisheni kuzingatia muda mzuri wa wananchi ambao watapata kusikiliza na kuangalia hotuba za Mheshimiwa Rais ili wananchi waweze kusikiliza hotuba zake kwani jambo hili litasaidia sana wananchi kuzijua habari na mambo yanayotekelezwa na Mheshimiwa Rais wetu kwa lengo la kuwapatia habari hasa wananchi wanaoishi vijijini.

OFISI YA BARAZA LA MAPINDUZI

Mheshimiwa Spika,

Kamati imepata fursa ya kupokea taarifa ya utekelezaji wa majukumu ya Ofisi ya Baraza la Mapinduzi, ambayo kwa kiasi kikubwa imekuwa ikitekeleza majukumu yake bila kuwepo changamoto za kibajeti ambazo zingekwaza utekelezaji wa majukumu yake kinyume na taasisi nyengine.

Mheshimiwa Spika,

Kamati imebaini baadhi ya changamoto ziliopo kwenye ofisi hii kwa sasa, ni kukosa eneo la kutosha na lenye nafasi kwa ajili ya uwekaji wa maktaba inayokusudiwa kutengenezwa katika Ofisi ya Baraza la Mapinduzi, ili iweze kutumika na Waheshimiwa Mawaziri wakati wa utekelezaji wa majukumu yao, kihalisia Ofisi ya Baraza la Mapinduzi ambayo ni moja kati ya Ofisi muhimu katika Ofisi ya Rais, Ofisi hii inajukumu kuu la kuandaa vikao vya Baraza la Mapinduzi na Kamati zake ikiwa ni pamoja na Kamati ya Kitaalamu ya Makatibu Wakuu.

Mheshimiwa Spika,

Kamati imeshauri katika kulipatia ufumbuzi suala hilo, Wizara ihakikishe kuwa inatafuta eneo jengine litakalotumika kwa ajili ya Ofisi za Baraza la Mapinduzi pamoja na kupata ukumbi kwa ajili ya mikutano ya Kamati zake. Kwa hatua za awali, Ofisi zilizopo zifanyiwe ukarabati na kutiwa rangi ili ziendee kutumika hadi zitakapopatikana Ofisi nyengine.

KITENGO CHA SERA, UFUATILIAJI NA TATHMINI

Mheshimiwa Spika,

Serikali ya Mapinduzi ya Zanzibar ya awamu ya saba imedhamiria kuimarisha utendaji kazi kwa viongozi na watendaaji wake ili, pamoja na mambo mengine, iweze kutoa huduma bora kwa wananchi na kuwaletea maendeleo endelevu. Hivyo, pamoja na hatua nyengine muhimu ilizozichukua, imeamua kuanzisha kitengo maalum cha ufuatiliaji na tathmini katika Ofisi ya Baraza la Mapinduzi ili kifanye tathmini ya kina ya utendaji na uwajibakaji katika kutekeleza majukumu mbali mbali ya kazi kwenye taasisi za umma Kamati inampongeza sana na kwa dhati Mheshimiwa Rais na Mwenyekiti Baraza la Mapinduzi kwa kukianzisha kitengo hicho na kumteua Balozi Ramia kukisimamia. Kamati

imefurahishwa sana na jambo hilo kwani imeona kwamba kuanzishwa kwa kitengo hiki kutasaidia utendaji kazi bora wa Wizara.

Mheshimiwa Spika,

Kitengo cha Sera, Ufuatiliaji na Tathmini kimeanzishwa kwa madhumuni ya kupata taarifa muhimu za utekelezaji wa mipango, mikakati na Sera za Serikali kwa lengo la kujua na kujipima ufanisi wa shughuli zilizotekelezwa na kupima jinsi rasilimali fedha zinazotolewa endapo zimetumika ipasavyo na kama zimetoa matokeo mazuri yaliyokusudiwa.

Mheshimiwa Spika,

Licha ya kuanzisha Kitengo maalum cha ufuatiliaji na tathmini katika Ofisi ya Baraza la Mapinduzi ili kifanye tathmini ya kina ya utendaji na uwajibakaji katika kutekeleza majukumu yake mbali mbali ya kazi kwenye taasisi za umma, Kitengo kinakabiliwa na changamoto ya kutokamilika kwa Muundo maalum wa Kitengo na kutokuwa na wafanyakazi wa kutosha ambao wanawahitajika ili Kitengo hicho kiweze kufanya kazi zake vizuri na kwa ufanisi zaidi.

Mheshimiwa Spika,

Kamati imeiagiza Wizara kuhakikisha kuwa katika Bajeti ya 2018/2019, Kitengo hiki cha Ufuatiliaji na Tathmini kinapangiwa Kasma yake ili kiweze kuwa na nguvu katika ufuatiliaji na kutathmini maendeleo ya mipango mbali mbali ya Serikali. Vilevile, Kamati imeishauri Wizara kusimamia uharakishwaji wa uandaaji wa Muundo husika wa Kitengo cha Sera, Ufuatiliaji na Tathmini pia ihakikishe kuwa wizara inakipatia Kitengo watendaji wenye uwezo na uzoefu ili waweze kufanyakazi kwa ufanisi, kabla ya Bajeti 2018/2019 ili Kitengo hicho kiweze kufanyakazi kwa mujibu wa utaratibu.

Mheshimiwa Spika,

Pamoja na hayo Kamati imeshauri Wizara kuhakikisha kuwa Kitengo cha Sera na Ufuatiliaji na Tathmini kinatoa Ripoti ya utekelezaji wa kazi zake katika kipindi cha awamu ya mwisho ya kazi za Kamati ya kusimamia Ofisi za viongozi Wakuu wa kitaifa ili Kamati yako iweze kukishauri Kitengo hicho.

IDARA YA USHIRIKIANO WA KIMATAIFA NA URATIBU WA WAZANZIBARI WANA OISHI NJE YA NCHI

Mheshimiwa Spika,

Idara hii ina dhamana ya kuhakikisha kwamba Zanzibar inanufaika na uhusiano uliopo baina yake na jumuiya za kikanda na kimataifa. Aidha, Idara inawaunganisha Wazanzibari walio nje ya nchi kwa dhamira ya kuwaweka karibu na kufahamu maendeleo ya nchi yao na waweze kusaidia katika nyanja mbali mbali za maisha ikiwa ni pamoja na shughuli za kiuchumi na kijamii.

Pamoja na mambo mengine, idara hii ni miongoni mwa idara muhimu sana katika Ofisi ya Rais na Mwenyekiti Baraza la Mapinduzi na kwamba inatekeleza majukumu yake vizuri sana lakini katika kutekeleza majukumu yake Idara inakabiliana na baadhi ya changamoto ya kuchelewa kupata taarifa za vikao vya mashirikiano baina ya Zanzibar na Tanzania bara.

Mheshimiwa Spika,

Kamati imeshauri Idara ya 'Diaspora' kuhakikisha kwamba fursa za kiuchumi na kibiashara zitokanazo na Wanadispota wa Tanzania zinasimamiwa na kuendelezwa vizuri kwa maslahi ya wananchi wa Zanzibar pamoja na kuwashajihisha Wanadispota wa kanda kujikusanya pamoja ili wajione kama Wanadispota wengine na kuweza kutoa michango yao mikubwa katika fursa za kiuchumi na kibiashara kwa Zanzibar.

Mheshimiwa Spika,

Kamati imeishauri idara kuwa na mfumo wa takwimu (data base) wa utoaji wa taarifa ili iweze iweze kuwafikia na kuwatambua kiurahisi wanadispota wa kikanda pamoja na kutanua wigo kwa kuwatumia Wanadispota wa Zanzibar ili waweze kutangaza utalii wa Zanzibar na kuweza kukuza maendeleo ya kiuchumi ya nchi yetu.

IDARA YA UENDESHAJI NA UTUMISHI

Mheshimiwa Spika,

Idara hii inajukumu la kuratibu na kusimamia Sheria, Kanuni za Utumishi na Kusimamia Shughuli za Uendeshaji wa Ofisi ya Rais na Mwenyekiti wa Baraza la Mapinduzi.

Mheshimiwa Spika,

Katika kuhakikisha utekelezaji mzuri wa Idara hii Kamati imeiagiza Idara hii kuhakikisha kuwa inaandaa utaratibu endelevu wa kupima afya ya wafanyakazi kila baada kipindi cha miezi sita pamoja na kuandaa programu ya kutoa taaluma ya ufahamu juu ya maradhi yasiyo ya kuambukiza kwa watumishi ili waweze kupata uelewa juu ya afya zao ikizingatiwa kwamba miongoni mwa watumishi wa wizara hii wanawahudumia viongozi wetu wakuu wa nchi. Aidha, Kamati imeagiza Idara kuandaa mpango wa Urithi wa nafasi Kazini (Succession Plan) ili endapo mkuu wa ofisi amefikia muda wake wa kustaafu kusiwe na nafasi tupu kutokana na kukosekana kwa mtu mwenye sifa za kushika nafasi hiyo.

IDARA YA MIPANGO SERA NA UTAFITI

Mheshimiwa Spika,

Idara ya Mipango Sera na Utafiti ina jukumu la kuratibu utekelezaji wa shughuli za Mipango, Sera na Tafiti za Ofisi ya Rais na Mwenyekiti wa Baraza la Mapinduzi. Kimsingi, Idara inatekeleza majukumu yake kwa ufanisi wa hali ya juu.

Mheshimiwa Spika,

Katika kuimarisha utendaji wa Ofisi, Kamati imeishauri Idara kuhakikisha kuwa kunakuwa na matokeo ya utafiti kwa wananchi juu ya fursa za masoko katika Jumuiya ya Afrika ya Mashariki. Pia kutoa taarifa za Mpango wa kupunguza Umasikini nchini (MKUZA) ili jamii iweze kuuelewa mpango huo na kuondokana na umasikini. Aidha, Idara imeshauriwa kuimarisha mashirikiano na vyo vikiu katika masuala ya utafiti.

OFISI YA USALAMA WA SERIKALI (GSO)

Mheshimiwa Spika,

Idara ya Usalama wa Serikali ni Idara yenye jukumu la kusimamia masuala yote ya usalama wa Serikali kwa ujumla wake, Kamati katika utekelezaji wa kazi zake imepata fursa ya kutembelea Idara hii na kuangalia utendaji wa kazi zake za kila siku kwa ujumla imeridhishwa na utendaji wa idara hii .

Mheshimiwa Spika,

Pamoja na utendaji mzuri wa kazi zake, Idara hii inakabiliwa na baadhi ya changamoto ikiwemo suala la uchakavu wa jengo linalotumiwa na Idara hiyo, upungufu wa vitendea kazi na kukosekana kwa eneo maalumu lenye usalama kwa ajili ya kuhifadha nyaraka muhimu za Serikali ambazo hutunzwa na Idara hiyo.

Mheshimiwa Spika,

Kamati inashauri kufanywa marekebisho zaidi katika Ofisi ya 'GSO' ili kuondokana na hali ya uchakavu wa jengo na kuwawezesha wafanyakazi kufanyakazi katika mazingira bora, mazuri na yenye usalama zaidi. Aidha, katika kuimarisha ufanisi katika kazi za Idara hiyo, Kamati imeshauri kufanyiwa marekebisho Sheria inayohusiana na uwepo wa Idara ya Usalama wa Serikali (GSO)-Zanzibar, ambayo kimsingi ni moja ya sababu ya kuwepo kwa changamoto nyenginezo zinazoikabili Idara hii.

OFISI YA RAIS NA MWENYEKITI WA BARAZA LA MAPINDUZI- PEMBA

Mheshimiwa Spika,

Ofisi hii inajukumu la kusimamia Shughuli zote za Ofisi ya Rais na Mwenyekiti wa Baraza la Mapinduzi kwa upande wa Pemba.

Ofisi inaendelea kutekeleza majukumu yake kwa ufanisi wa hali ya juu licha ya kuwepo kwa changamoto za hapa na pale.

Mheshimiwa Spika,

Kamati ilitembelea maeneo mbali mbali katika Ikulu ya Mkoani na kubaini kuwepo kwa changamoto kubwa inayotokana na athari ya mmong'onyoko wa ardhi unaosababishwa na mawimbi ya maji ya bahari licha ya kuwepo kwa juhudi za kujenga ukuta wa mawe ambao utasaidia kwa kiasi kikubwa kuzuia hali hiyo ya mmong'onyoko wa ardhi katika Ikulu hiyo. Kimsingi, kuendelea kwa mmong'onyoko huo kutasababisha athari kubwa ikiwemo kubomoka kwa jengo hilo.

Mheshimiwa Spika,

Kamati imeshauri Ofisi kuhakikisha kuwa ujenzi wa ukuta katika Ikulu ya Mkoani unaendelezwa kwa hatua za awali huku kukitafutwa njia bora za kitaalamu ili kunusuru majengo ya Ikulu kutokana na hali ya mmong'onyoko unaoendelea.

Hata hivyo, kutokuendelea kwa ujenzi huo kunatokana na uhaba wa fedha ambapo jumla ya shilingi milioni thelathini zimetolewa kwa Wizara ya Miundombinu kwa ajili ya kusimamia ujenzi huo lakini hadi Kamati ilipotembelea eneo hilo kazi hiyo ilikuwa haijafanyika pamoja na mambo mengine ambayo yanaonekana kwamba ni masuala ya kitaalamu.

Mheshimiwa Spika,

Kamati inaiagiza Ofisi ya Rais na Mwenyekiti wa Baraza la Mapinduzi kuhakikisha kuwa ujenzi wa ukuta huo unaendelezwa pamoja na kutafuta njia mbadala za kitaalamu ambazo zitatumika ili kunusuru jengo la Ikulu na hali ya mmong'onyoko unaoendelea hivi sasa.

HALI YA KIFEDHA YA JUMLA KWA (ORMBM) KATIKA KIPINDI CHA JULAI-DISEMBA, 2017/2018

Katika Kipindi cha Julai-Disemba, 2017 Ofisi ya Rais na Mwenyekiti wa Baraza la Mapinduzi Fungu A01 lilijipangia kutumia jumla ya TZS.3,161.2 milioni. Kati ya hizo, **TZS 1,665.5** milioni kwa ajili ya mshahara, **TZS 1,178.7** milioni kwa matumizi ya kazi za kawaida na TZS.317.0 milioni kwa ajili ya mradi wa maendeleo. Fungu AO2 lilijipangia kutumia **TZS.861.2** milioni. Kati ya hizo, **TZS. 440.9** milioni kwa ajili ya mishahara na **TZS.420.3** milioni kwa matumizi ya kazi za kawaida. Hadi kufikia Disemba, 2017 Fungu A01 liliingiziwa **TZS. 2,892.5** milioni sawa na asilimia **93**. Kati ya hizo, **TZS. 1,650.8** milioni sawa na asilimia **99** kwa ajili ya mishahara, **TZS.999.7** milioni sawa na asilimia **85** kwa matumizi ya kazi za kawaida na **TZS. 242.0** milioni sawa na asilimia **76** kwa ajili ya Mradi wa Maendeleo. Fungu A02 liliingiziwa **TZS.449.3** milioni sawa na asilimia **101** kwa ajili ya mshahara na TZS. **277.3** milioni sawa na asilimia **66** kwa matumizi ya kazi za kawaida.

Mheshimiwa Spika,

Katika kuimarisha utekelezaji mzuri zaidi wa majukumu ya kila Idara zinazosimamiwa na wizara hii. Kamati yetu imetoa maoni, ushauri na maagizo mbali mbali, ambayo tunaamini yakitekelezwa yatazisaidia sana utendaji kazi ulio bora kwa taasisi zetu

Mheshimiwa Spika,

Naomba nichukue fursa hii kuwapongeza na kuwashukuru wajumbe wa Kamati hii kwa ushirikiano wao mkubwa uliopelekea leo hii kusimama mbele yako na kuwasilisha Ripoti hii ya mwaka 2017/2018. Bila ya ushirikiano huo kamati hii isingeweza kufanikisha

majukumu yake ambayo yamepangiwa na baraza kwa mujibu wa kanuni zinavyoelekeza kwa hiyo naomba kwa dhati nichukuwe fursa hii ya kuwatambua na kuwatajakwa majina Wajumbe wa kamati hii kama ifuatavyo:

- | | |
|---------------------------------|--------------|
| 1. Mhe. Omar Seif Abeid | Mwenyekiti |
| 2. Mhe. Panya Ali Abdallah | M/Mwenyekiti |
| 3. Mhe. Amina Iddi Mabrouk | Mjumbe |
| 4. Mhe. Hussein Ibrahim Makungu | Mjumbe |
| 5. Mhe. Mussa Ali Mussa | Mjumbe |
| 6. Mhe. Mtumwa Suleiman Makame | Mjumbe |
| 7. Mhe. Ame Haji Ali | Mjumbe |

Aidha, kamati inaratibiwana Makatibu wawili ambao ni:

1. Ndg. Karima Abdul Wahab
2. Ndg. Talib Enzi Talib

HITIMISHO

Mheshimiwa Spika,

Kwa mara nyingine napenda kuchukuwa fursa hii kukushkuru kwa dhati kwa kuniruhusu kuwasilisha Ripoti hii ya Kamati ya Kusimamia Viongozi Wakuu wa Kitaifa mbele ya Baraza lako tukufu. Pia, nawashukuru Wajumbe wote wa Baraza hili kwa ustahamilivu na usikivu wao wa hali ya juu kwa muda wote niliokuwa hapa nikiwasilisha Ripoti hii. Nawaomba Waheshimiwa Wajumbe, waijadili, waichangie na hatimae waipokee Ripoti hii sambamba na hilo tunachukua fursa hii kwa niaba ya kamati yetu, kutoa shukurani kwa Mawaziri, na Manaibu Waziri, Makatibu Wakuu pamoja na watendaji wote wa wizara zinazosimamiwa na kamati yetu kwa mashirikiano yao waliotupatia katika kutekeleza majukumu ya kazi za Kamati. Aidha, napenda kuwashukuru watendaji wote wa Baraza wakiongozwa na Katibu wa Baraza la Wawakilishi kwa kuiwezesha Kamati hii kutekeleza kazi zake kwa ufanisi mkubwa.

Mheshimiwa Spika,

NAOMBA KUTOA HOJA.

Ahsante,

.....

(Omar Seif Abeid)

Mwenyekiti,

Kamati ya Kusimamia Viongozi Wakuu wa Kitaifa,

Baraza la Wawakilishi,

Zanzibar